

KINDERKERK LES: Die Bybel is – Die Boodskap oor nuwe lewe in Christus

Doel van les:

- Vierde les in ons reeks oor die Bybel. Kinders gaan in hierdie les leer wat wedergeboorte beteken. Hierdie reeks is aangepas uit Kids Sunday School Place.

Ysbreker 1: Verander jou voorkoms: Deel kinders twee-twee op. Die paar draai dan hul rûe op mekaar. Al twee verander dan iets omtrent hul voorkoms bv. haal bril af, trek skoene uit, haal oorbelle af ens. Hulle moet dan raai wat omtrent ander een se voorkoms verander het. Speel so twee na drie rondtes en kyk hoe kreatief hulle kan raak.

Ysbreker 2: Skoonheid uit rommel: Gee vir elke groep 'n sak met items wat as rommel beskou word. Hulle kry nou 10 minute kans om iets mooi uit die rommel te skep.

Verlede week het ons geleer hoe die Bybel ons lig op ons pad op aarde is. Vandag gaan ons ook leer oor die boodskap van Jesus en 'n nuwe lewe in Hom wat deur die hele Bybel voorkom. Al lees ons eers in die Nuwe Testament van Jesus se koms na die aarde, word daar al oor Hom gepraat van die heel eerste boek in die Bybel. Die Bybel vertel ons dat ons almal as sondaars gebore word, maar ook dat deur Jesus en wat Hy vir ons aan die kruis gedoen het, ons 'n nuwe lewe kan hê.

Storie: Die oogseer (Om die storie meer visueel vir kleintjies te maak, kan jy 'n ou huis teken. Maak aparte tekeninge van gemors ens. wat geplak word rondom die ou huis. Maak ook 'n aparte fontein, paadjie ens. Soos die huis en die vlak skoongemaak word met die vertel van die storie, kan jy die gemors afhaal en die mooi verbeteringe by huis plak.)

Daar was 'n groot stuk grond wat vol bossies, klippe en gebreekte glasstukke was. Mense het hul gemors sommer daar gaan gooi. Om dinge erger te maak, het 'n ou, lelike huis in die middel van al die gemors gestaan. Die vensters is al jare terug uitgegooi. Mense het vertel hoe die huis vol rotte en muise en ander soorte “creepy” goed was. Mense wou nie eens verby die plek loop nie.

Een mooi lente oggend, het 'n man bekend as “Die Tuinier” verby die oop stuk grond geloop. Die bossies was nou al heuphoogte en brommers het rondom al die gemors gevlieg. Die ou huis het hartseerder as ooit vantevore gelyk. Die man het vir 'n oomblik gestop en toe begin rondstap op die vlak. Party mense het dit gesien en hoe die man notas maak in 'n boekie en toe vinnig wegstap. Die Tuinier het genoeg gesien van al die gemors.

Vinnig het die storie deur die dorp geloop dat die man die burgermeester gaan vra om die stuk grond skoon te maak en die ou huis plat te slaan. Hoe kon enige iemand kwaad vir hom wees daaroor? Die oop stuk grond het die hele dorpie 'n slegte naam gegee. Dit maak nie saak of dit baie geld sou kos nie, die burgermeester se kantoor moet maar net die geld kry. “Dis nie reg om so oogseer in ons dorp te hê nie,” het die mense gesê. “Iemand moes iets doen.”

'n Week later het die Tuinier die kantore van die burgermeester binnegestap. Die klerk agter die toonbank het haar reggemaak vir 'n bakleiery. Sy het geweet daar is eenvoudig nie geld om daardie stuk grond skoon te maak nie.

Die Tuinier het na die toonbank toe gestap en gevra hoeveel die ou huis op die vlak kos? Hy wil dit graag koop.

Al die mense in die dorpie was verkeerd. Die Tuinier wou nie die huis plat vee nie, hy wou dit hê.

“Dit gaan ‘n duur storie wees om daardie huis en grond weer mooi te kry”, het die klerk gesê.

“Moenie jou daaroor bekommer nie”, het die Tuinier gesê. “Is dit te koop of nie?”

Die klerk het haar kop geskud. “Ja Meneer, dit is.” Net daar en dan het die Tuinier dit gekoop.

Die hele somer lank het hy en sy vrou hard gewerk. Hulle het al die lelike bossies uitgetrek, die gemors weggegooi en die huis reggemaak. Daarna het hulle die bome gesnoei en ‘n klomp pragtige blomme geplant. Hulle het selfs ‘n mooi paadjie gemaak wat lei na die voordeur van die huis toe. Agter die huis het hulle ‘n pragtige fonteintjie gebou. Die stuk grond en huis wat eens op ‘n tyd so oogseer was, het nou te pragtig gelyk. Liefde, tyd en werk het hierdie stuk grond heeltemal verander. Nou het mense uit hulle pad gegaan om verby die huis te stap en daarna te kyk.

Party mense is soos daardie ou huis wat in die middel van ‘n stuk grond sit wat met rommel besaai is. Hulle doen verkeerde dinge en ken nie vir Jesus nie.

Wanneer ons ons hartjies vir Jesus gee, kom die Heilige Gees, net soos die Tuinier, en maak ons hartjies skoon van binne. Dan lyk ons aan die binnekant selfs nog mooier en skoner as wat ons kan dink daardie huis en tuin gelyk het.

Dan wil jy nie meer verkeerde dinge doen nie. Jy wil dan eerder dinge doen wat God gelukkig maak. Het julle al hierdie boodskap in die Bybel gelees?

Sluit af met gebed in groepe.